

09. maj 2017

1. klassimiik meeqqat atuarfiisa tamarmik pinngitsooratik tuluit oqaasiinik takornartat oqaasiisut atuartitsisalnissaat qularnaarumallugu Meeqqat Atuarfiat pillugu Inatsisartut inatsisaannut nr. 15, 3. December 2012-imeersumut allannguutissamik saqqummiusseqqu-llugit Naalackersuisut peqquneqarnissaannik Inatsisartut aalajangiiffigisassaattut siunner- suut. Suliniutip tamatuma kinguneranik kalaallit danskillu oqaasiinik atuartitsineq ajorneru- lersinneqassanngilaq. Allannguut atuutilersinneqassaaq ukiup atuarfiusup 2018-mi aallartin- neraniit.

(Inatsisartunut ilaasortaq Nivi Olsen, Demokraatit)

Inatsisartunut ilaasortap Nivi Olsennip aalajangiiffigisassatut siunnersuutaanut Siumumiit imaat- tumik oqaaseqassaagut.

Siunnersuuteqartup meeqqat atuarfiini tuluit oqaasii 1. Klassimiit ilinniarneqartalissasut siunner- suutigaa.

Siunnersuutigineqartoq itinerusumik isummorsorfigitinnagu eqqaasitsissutigerusunnarpoq Ilinniar- titaanermut, kultureqarnermut, Ilisimatusarnermut Ilageeqarnermullu Naalackersuisoqarfiup suleqa- tigiissitaq immikkut oqaatsinik ilikkalertortarnermut ilisimasaqartut pilersissimmaggit, suleqati- giissitap qulaajartussaavaa nunatsinni atuartut kalaallit, qallunaat tuluillu oqaasiinik qanoq periuse- qarlungi ilinniartitsitisoqarpat pitsaanerpaanik inerititaqarfiussasoq, siunnerfimmi ilisimasanik pata- jaallissaasoqarniarpoq, taamaaliornikkut pittaanerpaamik ilisimatuussutsikkullu toqqammaveqar- tunik sakkussaqaalernissaq angujumaneqarluni.

Naalackersuisoqarfik siunnersuuteqartoq sulii Naalackersuisuutillugu suleqatigiissitaq pineqartoq aallartinneqarnissaa siunnerfiusimavoq. Naalackersuisullu nikereerneratigut suliaq aallartisarlungi.

Suleqatigiissitaq immikkut ilisimasalinnik inuttaqartoq nunatsinniillu aamma peqataatitaqartoq misissuilluni sulereeruni oqaatsinik ilinniartitsinermi qanoq pitsanngorsaasoqarsinnaaneranik

inassuteqaateqartussaavoq. Taamaammat suliat tukattumik imminnullu qalleraattumik peqqunagit Siumumiit innersuussutigissavarput suleqatigiissitap inassuteqaatai utaqqineqassasut.

Siumumiit pingaarteqaarput nunatsinni oqaatsinik ilinniartitsinerup qaffassartuarneqarnissaa, soorlu aamma pingaartikkipput qallunaat oqaasiisa maanna takornartat oqaasiini salliullutik inissisimasut tuluit oqaasiinik taarserneqassasut. Siumumiit killilersugaanngitsumik nunarsuarmioqataaneq toqqarparput, aamma nalunngilarput nunat tamalaat peqatigissagutsigit oqaatsit amerlanerussuteqangaartunit atorineqartut aallaaviusariaqartut.

Taamalli oqarneq ima paasineqassanngilaq qallunaat nunaannut attaveqartut ilaqutariinnikkullu pituttorsimasut taava imminnut paaseqatigiissinnaajunnaassasut, qallunaat aamma tuluit oqaasii atorlugit oqaloqatigineqarsinnaapput, aamma ima paasineqassanngilaq qallunaat oqaasii takornartat oqaasiini nunatsinni salliutinneqarunnaarpata taava atorineqarsinnaajunnaassasut ilinniarneqarsinnaajunnaarlutillu. Meeqqat atuarfiat tassaasariaqarpoq nunanik tamalaanik suleqateqarnikkut oqaatsinik arlalippassuarnik ilinniartut namminneq toqqarsinnaasaannik ilinniartitsiviusoq, ullumikkummi aamma tamanna atorineqarpoq. Ilinniartitsisoqarpat oqaatsinik allanik atuartitsinnaasoq ilisimagatsigu piginnaasai atorluarneqartartut.

Inuusuttavut pissutsit piviusut periarfissanillu annertuneraartunik ammaassisut aallaavigalugit ilinniartitaanikkut aqutissiuutissavagut, nalunneqqaarpummi aamma qaffasinnerusumik Qallunaat Nunaanniluunniit ilinniarniaraanni Tuluit oqaasii oqaatsillu allat amerlanerusunik atorineqartut aallaavigalugit atuartitsineq ingerlanneqartartoq.

Taamak oqaaseqarluta ilisimatuussutsikkut ilisimaneqareersoq naggasiutigerusutarput tassaavoq, meeqqat allanertat oqaasiinik ilikkalserternerusarmata oqaaseqqaaminnik pitsaasumik tunngavissinneqarsimagaangata. Meeqqat atuarfiat pitsaasumik angusatigullu qaffakkiartortumik unammiillersinnaassusilimmillu ineriartortinnissaani susasaqartut tamarmik suleqatigiilluarnissaat kaammattuutigaarput.

Tassaniipput Ilinniartitsitsisunngorniat atuarfiat tamanit qitiusumik inissisimasoq.

Ilisimatuussutsikkullu ilisimaneqartut oqariartuutigippassuk allanertat oqaasiinik ilikkalserterneq oqaaseqqaanik tunngavissagissaarnermik aallaaveqartoq Ilinniarfissuaq nunatsinni oqaluttuarisaa-

nikkut pingaaruteqangaartumik inissisimasoq naleqartitatsinnik kinaassutitsinnik oqaatsitsinnillu immikkut eqqummaariffeqarluni ingerlatsinissaanik kaammattorparput.

Siunnersuuteqartulli taasissutissartaani oqaaseqatigiit toqqammavigisai tunngavilersuuteqarluta saqqummiuteriikkavut aallaavigalugit itigartitsissutigineqarnissaa innersuussutigaarput.

Vivian Motzfeldt

Siumut